



26. maj 2010

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpuga:

Meeqqat atuarfiannit 2007-mi naammassisut 42 %-tii ukiut marluk qaangiunneranni ilinniagaqarlutik aallartipput. 42 %-it taakku iluanni qassit nunaqarfinneersuuppat?

(Inatsisartunut ilaasortaq Naaja Nathanielsen, Inuit Ataqatigiit)

Aningaasaqarnikkut Ingerlatsineq pillugu 2010-mit nalunaarummi atuarneqarsinnaavoq nunaqarfinni atuarfiit illoqarfinnut naleqqiullugit marloriaammik amerlanerusut. Taammaakkaluortoq meeqqat atuarfianni atuartut 16 %-tii taammaallaak nunaqarfinneersuusut aamma atuarneqarsinnaavoq. Nunaqarfinni atuartsinerup annersaa ilinniarsimanngitsunit ingerlanneqartarpoq.

Inuiaqatigiinni ilinniartsinerup qaffanneratigut ilaqutariinni aningaasaqarnek qaffanneqaannarani aamma Kalaallit Nunaanni nammineerneruneg tunngavilerneqassaaq. Taammaattumik pingaaruteqarpoq tamatumani alloriaatsit ukiut tamaasa nalunaarsorneqartarnissaat.

Pissutsini taammaattuni nalunaarsuutit pingaaruteqarluinnarput, taakkumi takutittarpaat ilinniartitaanikkut qanoq ingerlasoqarnerseq. Ilaatigut aamma pissusissamisoorpoq paasissallugu, inuusuttut ilinniarniarnerminni suut tunuarsimaarfigisarneraat suullu salliuittarneraat. Misissuinerit arlallit tikkuarnikuuaat nunaqarfinni meeqqat inuusuttullu illoqarfinni taamaaqqatiminnut naleqqiullutik ajornerusumik inissisimasartut (soorlu assersuutigalugu nalunaarummi "Meeqqat peqqissusaat pillugu nalunaarut – Inuuneritta").

Assersuutigalugu akuerineqarsinnaangilaq meeqqat inuusuttullu sumi najugaqarnertik pissutigalugu pisinnaanerminnik tamakkiisumik angusaqarsinnaangippata. Taammaattumik pingaaruteqarpoq meeqqat inuusuttullu atugaat pillugit paasissutissat annertunerpaat piginissaat, tamakkumi pigigaanni ajornartorsiutaasinnaasunik aaqqiiniarneq ingerlanneqarsinnaagaluarat.